



QUÆSTIO MEDICA,
QUODLIBETARIIS DISPUTATIONIBUS
MANE DISCUTIENDA
IN SCHOLIS MEDICORUM.



Die Jovis vigesimâ Decembris.

M. CLAUDIO QUARTIER,
DOCTORE MEDICO,

PRÆSIDE.

*An incipienti Dysenterie præsentius ab Astringentibus aut
Emeticis, quàm à Venæ-sectione remedium?*

I.

ALVINA regio partes inter alias continens, quæ nutritioni corporis apparant & adornant cibos, morbis benè multis obijcitur: iis mendendi ratio plurimum ardua & dissimilis occurrit. Quamvis enim partes illæ ad communem universi salutem consentiant, nec minimum inter se cognationis habeant, suisque se invicem tueantur nativis viribus & auxiliis; ad diversa tamen destinantur munia, quæ singillatim potulentorum & esculentorum coctioni distributionive, superfluatorum quoque excretioni impenduntur. Ex iis expletis officiis, quibus expromitur tum humorum integritas, tum laudabilis partium earum constitutio, quæ sunt fundamenta vitæ, tota corporis œconomia sustinetur: his verò humoribus immutatis, iisdemque partibus malè habitis, hæc œconomia ruit, sæcunda surgunt medicinæ opera; spiritus, sanguis, humores, excrementa pervertuntur, nec parùm de pristinâ naturæ suæ bonitate decedunt: tunc corpus *κακοχυμία* seu humorum impuritate sordescit; hæc ineluctabili necessitate redundans, undequaque confluit tum ad intestina tum verò maximè ad mesenterium velut ad sentinam communem: harum sordium collectioni segniorique moræ occasionem præbet mesenterii tum substantia, quæ tota bibula & spongiosa est, uberibus conspersa glandulis; tum ejusdem structura, quæ ex duplici membranâ instar sacci concin-

natur : ibi autem hæc impura materies diu stagnans & perpetuò affluens, Diarrhœa, Dysenteria, Cachexia aliorumque difficultum & longorum affectuum parens jure præsumitur. In his sedibus sordes illas sistere qui tentat, aut per vias invias minùsque naturæ familiares derivare, nondum artis tyrocinia posuit, & turpiter à recto methodicæ curationis scopo digreditur.

I I.

ΔΥΣΕΝΤΕΡΙΗ dicitur exulceratio intestinorum dolorificas & cruentas dejectiones inducens. Hæc se prodit crebro alvi fluore cum gravi doloris sensu, torminibus & molestâ desidendi cupiditate. Primò quidem nihil penè excernitur, nisi mucosum quiddam, pingue, viscidum, ramentosum cum magno conatu; mox pars serosa sequitur humoris illius ebulliendo spumantis; tum saniosa impuritas fluit: utraque suis aculcolis membranosas partes divellens: corrosis & apertis venarum ostioliis cruor emanat: tum fraugitur virtus intestinorum, & horum ruina patet in excretionis interioris membranæ dejectionibus permixta, nec rarò propria intestini substantia putris fataliter procidit. Intestinum nullum est, quod hujus affectionis tormenta non persentiat: cum continui dolores sint quibus torquetur ager, nec diurnæ nec nocturnæ quieti partem ullam impertiunt: variè se jactat, nec certo stare loco potest; se propè funeratum clamat; suique impatiens cibos ferè omnes haustusque cum indignatione respuit: diris hisce symptomatis assident anxietas, ventris inflatio, sitis ardens, ructus importunus, quibus perspicitur ventriculum quoque in consensum trahi. Nequaquam autem procedit hæc affectio incommutata febre, quæ licet primis temporibus aliquantisper obscurior, sensum tamen emicat & invalescit, delirio, capitis gravitate nonnullis aliis febrium symptomatis ut plurimum privata, ita ut ferè semper Dysentericus ad extremum usque spiritum permaneat mentis compos, hæc tetrâ regnante in alvinâ regione crudeliter.

I I I.

QUI Dysenteriam progignit humor, ex toto corpore in alvum prorumpit. Sanguis ex pluribus constat humoribus: hi diversi licet generis confusi inter se & quodammodo uniti, dum probi sunt sibi que coherant, naturaliter se habere censentur; semel vitati, nativo suo decore exuuntur & pravam naturam induunt: dissolvuntur sæpissimè & à se invicem dissiliunt. Pars vincens, sive sit pituitosa, sive biliosa non ampliùs ligatur, suique tunc juris in illâ perturbatione, naturæ non subijcitur, nec non vitio suo armata superbiere solet, multorumque est sui generis morborum procreatrix. Fluxus Dysenterici, cum sit communis & epidemius, jure causas prævias repetes ab usu communi cibi, potus, aëris, ut quibus vita animalium potissimum tenetur. Necessitas aëris cui non nota? spiritus, in quibus corporis nostri vigor sistit, ex aëre & subtiliori sanguinis parte constanter: aër vitæ necesseque arbitri agnoscitur: nos sanos reddit, cum purus contactu, inspiratu, transpiratu nos afficit: morbosos, dum vitatus nos inficit: specuum, cadaverum aliorumque putrescentium expirationibus imbutus, massam sanguineam inquinat: fervente & igneâ tempestate non mediocriter lædit optimam quamque temperiem, æstum inurit præcordiis, quo spiritus flammam capiunt & quilibet humor incandescit. Potuum quoque depravatæ qualitates instrumenta sunt hujus affectionis Dysentericæ, quales sunt aquæ corruptæ, limosæ, palustres, lacustres & quas nunquam aura liberior verberat: accedunt & ova,

carnes, pisces, aliaque corrupta quæ comedantur difficillimis temporibus & infelici annonæ caritate premente, fructumque penuriâ : omnium tandem ciborum usus qui sunt alieni, pravi vitiosique succi, inter quos fungi cujullibet sint generis jure recensentur, quos salutis suæ studiosi in æternum ejurare debent : horum malignitatis conscia abhorrent quadrupedes, & homines, proh dolor ! luxurianti palato blandientes, hoc venenum suaviter vorant.

I V.

MEDICAMENTA Στυπτικὰ seu Astringentia humorem influentem in aliquam corporis partem retinent, eundemque aut impingunt aut retrudunt & remeare cogunt : crassæ sunt ut plurimum terrenæque substantiæ. Harum dotum vi & facultate suas actiones exerunt. Emetica verò quæ vulgò dicuntur, vomitum provocant. Hæc veteres non nisi magnâ cautione usurpabant, ut quæ ventriculum irritando, vim ipsi inferunt. Longè præferebant Purgantia, quæ ad usum frequentius quàm parèst acuiuntur Emeticis : Purgantia opportunè data & absque magno apparatu paulatim subeunt viscera majoraque vasa humorum colluvie obfusa, quos insitâ proprietate familiariter prolestant, qui per loca commoda naturæ ministerio ejusdemque votis foràs ejiciuntur. Minus autem æquè de naturâ judicat, quisquis ejus legibus institutum esse vomitum audet affirmare : toto genere præternaturam est ; istam viam nunquam affectat natura, & si quando tenere videtur, invita semper id præstat, nec illa actio ex ejus nutu & propensione manat. Medicus ad illius imitationem factus cogitur nonnunquam iisdem vestigiis insistere, attentum ad hoc potissimum se præbens, ut vomitus numeros expleat omnes salubritatis ; adsit vomendi facilitas, nulla sit ex parte subjecti repugnantia, nihil aut minimum molestiæ & offensionis secum portet ; omnis demum necessaria adhibeatur præparatio. Vix tamen pleno pectore sapiens persuadebitur, in usum frequentem adhibere præsidium, quod motus extraordinarios concitat & naturam convellit : apprimè quidem novit ventriculum inter partes nutritas principem censei, illius salute vim omnem viscerum contineri ; prospicit inter omnia ejus tenori servando, exploratum tenens, hoc malè habito, hoc deformato, compati cæteras corporis partes & contabescere. Et cum non nisi potenti concussionem res ipsi molestæ per vomitum excludantur, quò validioribus Emeticis vomitio ciètur, eò majore vehementia & impetu ventriculus subvertitur, superstitè nimium crebro, inemendabili per quidquid est vitæ reliquum infirmitate. Plethoricis, pleuritidis, peripneumoniciis, tabidis, ex inflammatione stomachi singultientibus, nunquam ἐλάττωσι, seu cum ratione præscribitur.

V.

QUEMADMODUM apud Agyrtas & Parabolanos, qui nec observant naturæ motus, nec ejus vias tenent, in variolis, morbillis, erysipelatis aliisque affectibus hujus indolis incipientibus, creber est Astringentium usus & commendatio, quibus inconsultè naturæ salutarem impetum intercipiunt, materiam morbi effectricem, ad externa corporis tendentem, in suum alveum refundendo : sic non minùs temerè in Dysenteria incipiente Astringentia decernuntur ; horum quippe operâ mordax & effusus humor suppressus & retentus, abscessum facit vel in lateribus & visceribus vel in articulis ; noxia quippe omnia, noxiè retinentur, & hinc magnæ aliæ clades emergunt. Sub initia quoque Dysentericæ vitiosam materiam effervescentem

spumantemque, in intestina cadentem per Emetica sursum evocare grandis calamitas; ventriculus siquidem, qui per consensum & viciniam duntaxat afficitur, hujus fluxus Dysenterici minimè conscius est: & cum sit cibi potionisque commune receptaculum, citra gravem noxam fordium illuvie fœdari nequit; vomitio tunc temporis citata, plena laboris est; ventriculum conturbat, ejusque robur exoluit: quid autem iniquius dignissimam hanc partem, perverso ordine, vili huic officio mancipari? Satis jam ipse languet à sævâ exhalante mephiti, quâ dejicitur appetentia, corpus enervatur, cor ipsum effeminatur; fit demum statûs naturalis miserandâ prolapsio. Viam igitur tritam amplectere, viam rationi consonam, veterum fultam observationibus, usuque ipso ut & magistrâ rerum experienciâ comprobata: hæc primis hujus affectionis temporibus in liberali sanguinis detractione posita est; hæc inter Dysentericæ præsidia, ut & omnium inflammationum, principem locum tenet: hujus ope singulari, magna pars proluvie fœdæ ad intestina ubertim per venas illabentis adimitur, ligna foco subtrahuntur, febrilis æstus mitescit, partium affectarum fervor extinguitur; naturali tandem viscerum redvivâ temperie, & reliquiis materiæ morbificæ subactis & edomitis, datur purgationi locus aptior ex blandis & benignioribus medicamentis, quæ absque torsione minorique periculo materiem hanc excretioni paratam prorsus eliminant. Tunc in usum quoque tempestivè veniet radix Brasiliensis dicta Ipecacuanha, ante quinquaginta annos in hanc urbem asportata, cujus præcipua vis est, modicâ quidem dosi pluries repetitâ, deorsum purgare & altringendo viscerum tonum restituere, non omisis interim per prima hujus affectionis tempora, tum largiore potu, tum frequentibus enematis ex decocto mesenterii vitulini, omalorum, sero lactis aliisque beneficiis auxiliis, quæ intestina recreent, & ad ipsorum tutelam & solatium, humoris transeuntis morsus acerrimos deliniant,

*Non ergo incipienti Dysentericæ præsentius ab Astringentibus
aut Emeticis, quàm à Venæ-sectione remedium.*

Domini Doctores disputaturi.

M. Franciscus Aignan.

M. Joannes-Baptista Doye.

M. Antonius de Saint-Yon,
Medicus Regis ordinarius.

M. Jacobus Fourneau.

M. Urbanus Leaulté.

M. Joannes Robert.

M. Nicolaus Brunel de la Carliere,
Medicus Regis ordinarius.

M. Michaël Pichonnat.

M. Ludovicus Gayant, Me-
cus Regis ordinarius ve-
teranus.

Proponebat Parisiis ANTONIUS PEPIN, Parisinus,
Baccalaureus Medicus. A. R. S. H. 1703.

Apud Viduam Francisci Muguet, Regis & Facultatis Medicinæ Typographi.